

7

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 29 1941

T 5413 / 2142

崑東洲集卷之十八

墓表五篇

都察院右僉都御史一泉王君墓表

魏揚在洞撰

世有介丈夫秉義勳操與時齟齬者可謂窮乎斯固
世俗之所窮也君子以為達焉有窮風靡波馳終身
富貴者可謂達乎斯固世俗之所達也君子以為窮
而介考一泉王君之出處而重有感也夫君清純人
物德明說一泉公曰在史冊君進於身入國門業
於今門下之館案曰及其父能文章甲子年歲八

崔東洲集卷之十八

墓表五篇

都察院右僉都御史一泉王君墓表

世有介丈夫秉義勵操與時齟齬者可謂窮乎斯固
世俗之所窮也君子以爲達焉有若風靡波馳終身
富貴者可謂達乎斯固世俗之所達也君子以爲窮
焉余考一泉王君之出處而重有感也夫君清宛人
諱德明號一泉余日在史館君遺其子身入闈問業
於余門聞之館寮曰是其父能文章舉甲子鄉試戊

維揚崔桐撰

哈佛大學漢和
圖書館珍藏印

辰進士主司崔後渠奇其文可以魁天下者也余索其所爲文得經義若干首古文若干首果有奇氣可奇也又聞之朝士大夫曰是其父有異政章章在人耳目者也余求其實筮仕封丘知縣劉瑾黨廖鵬荼毒河南三司以下咸受指使君獨不屈上官以爲異已苦以難平之訟君易易理之庚午鄉舉鵬之子鎧冒籍祥符貨文士代筆御史輩擬以魁選君發其奸亦取列第六無何給事中陳鼎劾鎧除名君聲益章既調嘉善寬糧長之積逋均豪猾之隱稅興學校建射圃以振作寒畯且設兵閱武卒成桃源之捷時有

御史按浙憤嘉善之不善事也多方挫折君不爲屈明年御史敗竟免中傷晉戶部主事運大同軍儲不私羨餘監臨清鈔解稅倍昔晉兵部郎中乞養病家居蓋耿介有爲而薄於勢利者也丁亥余出補藩臬於君不相聞者餘十年庚子余承乏國子祭酒闈來訶聞君已不作四年矣問君末節於闈迺知出守懷慶會歲饑君減征損費貸粟散居多所全活是歲禾麥瓜諸瑞疊見天子以爲賢褒以金幣晉太常少卿尋晉右僉都御史巡山西大同之變提兵境上爲聲援劾奏遊事文臣納賂將官者以振風紀且以

計得石州巨寇常誠心悉平其黨獨以治吏太嚴防
奸太密貪夫固側目伺之會行法宗人竟坐免臺臣
嘗數薦之未及起而卒寔嘉靖丁酉九月十有八日
也得年五十有六遡君之世本元學士磐之裔傳至
明善明善生忠忠生浩浩生恩君父也贈都御史母
楊氏贈恭人配郎氏封恭人子男三長即闡次閩郡
學生次文印女二長壻指揮謝宸次幼女孫一闡輩
卜庚子十月十有二日葬君於宛城之南嗟乎一泉
自筮仕至其終稜稜風節動違時好雖數遭拂抑而
屹然特立無所沮奪是世人雖欲窮之君亦何往而

不達也哉余昔考諸寮友士夫之評既聞諸厥子之
言頃讀後渠崔宗伯之銘廼信君果介丈夫也

太學生俞君合葬墓表

俞君維揚江都人也名攻字崇治年五十一歲嘉靖
甲申四月三日卒葬某地後十五年爲嘉靖戊戌其
配毛氏卒九月十七日也壬寅年某月某日出藁葬
啓君窶祔焉其友若戚迂湖葉大夫蜀岡盛大夫嘗
與之狀而徵諸銘矣君子材復以合葬表謁東洲崔
子崔子曰吾素善君之從弟都諫崇禮且葉盛二大
夫鄉之信人也諛墓之誚吾知免夫按二大夫之狀

曰君生而秀穎老成父從仕翁竒其必能子也館穀名士以授之業然而數竒屢弗第迺奉例卒業大司成君性孝友執親之喪哀毀逾禮處其兄若弟敬且愛怡怡如也兄弟以子姓蕃息請異居君涕淚從之田廬服用僕媵取其下者卜居務近故廬有所事必諮諸兄如昔是以其仲兄教每以君行淑其子肅乎有刑于之風焉君處里閭婣黨咸有恩周貧振弱不以自德有稱貸者輒應之或不能償輒棄券勿復責會歲凶多道殍君求而掩之又多置棺以殯所識之莫能舉者嘗夢一髯丈夫語之曰汝當有兩大厄

汝有陰德不汝厄也正德甲戌偕教之子渡江夜泊大儀津忽群盜入其舟君驚入水大呼曰若屬寧盡取吾財毋加害吾幼姪波濤中若有掖之者頃復近舟盜異之遂遁去明年胸發疽滯病不可瘳復夢有語之者曰二个人能辦此果得竺姓者愈之蓋竺乃二个也君乃思昔夢爲有徵竟不爲厄者神實相焉自是無復仕進志乃選勝於城之西北面山枕水亭池其中環以卉木扁其所曰怡情因以自號云時携一二同志游讌嘯詠徜徉移日人莫窺其際也君始配蕭氏有懿行先卒繼配毛氏江都天祥翁女壽昌

尹天秀之猶子也既婦俞每以其姑王不及養爲恨事其舅氏從仕翁甚恪事怡情君得婦道君游邑庠則篝燈爚茗資其誦讀君游國學則綜其家政俾無內顧君病疽則齧條勤劬誓以靡他是以君重之相敬如賓友者三十年終其身不置婢妾君卒毛痛之幾滅性教子勤學力業俾終父志教女必以古列傳孝經爲闡則宜其伯叔娣姒莫有間言閔卹貧苦亦未嘗責報嘗雪夜有僵仆於門者毛亟命內之室飲之燠之乃甦及晨以米帛爲遣有傳嫗者寡且貧厚貽之俾終其節哀其孤孀猶夫已也生子一即材太

學生孫四觀光觀順觀民一尚幼女孫二長適太學生顧天民次在室俞之先大寧漢人曾大父文友文友生永貴揚州衛中所百戶永貴生英字堯卿即君父從仕翁也配王氏生五子敏教數牧君后季敏指揮使教七品散官君叔父某按察副使都諫君父也嗟夫不有邴缺曷章其婦不有孟光曷章其夫怡情君之夫婦維德之行時所鮮儷表之貞珉斯其無朽矣

廣西按察司副使中憲大夫錢君墓表

嗚呼此吾友南浦錢君之墓也君諱鐸字振之號南

浦少時與余同師承托好論心每以顯名樹勩相期
待既余授史職君亦次第薦己卯鄉書舉辛巳進士
即館余所間語余曰疇昔之約發軔有階矣唯克考
終又吾願也君累官至憲臬駸駸有軒舉展揚之勢
乃以被論中阻君以爲非其罪也竟未白以殞太學
生冢嗣藻次嗣薰卜癸卯十二月某日葬君於清幹
鄉先塋奉其母柩合窆焉謂廼翁於余爲齟齬交也
謁余以表其墓余曰嘗槩論南浦子矣其爲人殆有
志者與奇所遭非人也按君釋褐初會

武宗皇帝大行即奉

命纂修廬慶諸郡實錄有精

核功嘉靖癸未授刑曹主事繫囚冬月多僵斃君請
爲晨設漿粥于今秩之甲申秋以論大政得寬 旨
沾危僅免丙戌奉 命論省江南重獄讞籀稱不寃
丁亥陟員外郎時勲戚坐占役伍卒奸法者屬君聽
之權貴或以爲請君不可曰法弛自近是國無刑也
必以其惡從數輩爲戮戊子陟郎中西樵太宰廉其
才出知端州端故多龐政君展布心力悉爲剗剔端
士鮮科目以營舍內遷爲咎君爲白當途卜善地並
新二庠嗣是登雋果相踵士論功郡守焉以父憂行
服去及闕改湖藩鄖陽鄖山郡也土磽風夷長吏苦

無成績君務以仁禮爲治民漸化德無何陟廣西按
察副使飭兵府江府江荔浦諸郡三洞窳窳萬山巉
嵯蠻虜猺醜怙阻積毒民病焉君至輸以悃幅諭以
利害嚴以偵邏威以舟兵於是乎悟者歸命悍者竄
伏且生得大憝數十人戮之以徇土人謂三十餘年
無此績也監察使悞以君爲不共乃刺君短遂致祿
余時以南陟過里君訴余曰吾平生以克終是期迺
今以求全中蹶恨無所從諍耳知我者吾子也別逾
月君訃至矣君敦孝友峻廉隅寡笑語治家儉取舍
明交游慎斯其章章聞者獨以性簡執任已自信不

能與時推移此其尤所及也室李氏於余室皆御史
周之自出封恭人婉慧慈孝聞德無缺君安焉終其
齒不置妾恭人亦敬侍君有冀孟風君卒恭人哭之
哀寢食起處無不念在君者未及歲心疾而卒君生
成化丁酉十一月十七日卒嘉靖辛丑十二月二十
二日年六十五恭人生成化丙申十二月二十三日
卒嘉靖壬寅某月某日年六十七生二子即藻薰三
孫九德九功九敘三孫女長歸通州千戶王廷揚蚤
卒次聘徐允升次尚幼君之先高祖貴一貴一生忠
忠生遂遂生盛號貞齋有隱德能以善富生三子長

錠海門庠學生中歲卒次鎰太學生未仕卒次即君
貞齋以君貴贈中憲大夫鄖陽知府君母戴贈恭人
君子曰南浦子上焉未嘗負其君次焉有以榮所生
中焉有以立其身施若未究而志固有定亦未爲不
遇也史臣表之諛墓也哉

贈刑部主事葉公封太安人高氏墓表

湖廣按察副使葉君觀於東洲桐爲丙子丁丑兩同
年君痛其二親之不可作也介使馳狀來京師以墓
表謁曰惟我先贈君刑部主事樂庵翁者諱萬字楚
榮生成化三年五月十八日卒正德十三年十二月

二十二日葬于蜀岡禪智寺之西原則丙申四月庚
申日也暨我先封妣太安人高生成化某年七月八
日卒嘉靖某年十月七日葬合先君窆則丙午十二
月十三日也墓石久虛以待夫子願爲二逝者表用
垂不朽桐曰表也者表其德也表夫婦者表合德也
桐家食時嘗拜翁於竹西堂下安人年六十時嘗壽
以文是桐知二逝者之素舊矣表安能辭按狀葉之
先婺州人樓姓以其父衛千戶諱賢者出嗣母舅葉
思銘後遂姓葉居江都娶於蘇生五丈夫子贈翁其
第五子也封安人裔出尚書宮保宗選公乃封工部

主事欽之女也其世系詳於黃雪洲司馬盛蜀岡岡
卿二誌銘亡庸複述已惟翁氣和質重雅量直中誠
可動物正足表俗安人則淑質端莊言動不苟以禮
自閑克循順軌是則茂稟懿行可合表者一也惟翁
竭力事親所欲必遂臨喪守禮哀思成疾安人則敬
事舅姑安寢始退衣食親供進侍不怠是其純孝敦
本可合表者二也惟翁友于伯仲推產讓財一錢尺
帛無私妻子安人則勸翁退讓善處娣姒力勤守儉
囊無私畜是其宜家睦親可合表者三也惟翁庭訓嚴
飭務期成立麥舟示義勗以濟物安人則延師教子

程課責義親黨吊慶必期從厚是則淑後好施可合
表者四也為之嗣者有四子三女五孫皆肖德不羣
且並拜顯褒壽考以終亦難也已今夫匹夫匹婦一
行可述君子取焉况夫婦皆賢其容泯哉二逝者之
隱德細行可誦者無能悉表表其章章明者使天下
後世知葉氏之門有並美焉過斯基者亦宜式矣

封蔡節婦姜氏墓表

蔡母諱妙慧者江都處士暉之女爇之配史館生圻
之母也以嘉靖壬寅八月二十四日卒圻以某年某
月某日改葬其先人於某山原奉母柩合而封焉廼

虛墓石謁予于南省願表母平生予曰名實貴符言
斯有徵母之可表者曷徵哉圻涕泗漣漣下出秋曹
卿蔡君汝楠狀以徵其言曰母氏室處時敏穎迥軼
羣兒閑閭範力女紅凜然以禮自防弟妹中有怠且
嬉者每規以正厥母高亦倚以爲安焉於是宗黨閭
里莫不稱曰姜有賢女母既歸蔡以不及事姑姜爲
恨事其舅氏藿軒公繼姑陳甚謹藿軒公以貢士家
食理生無羨陳生諸叔孱弱未立母獨任苦辛操井
臼具饗殮勤勤怡怡必得其歡而後已於是閭里鄉
邑莫不稱曰蔡有孝婦弘治辛亥燠以力田過勞年

二十八而卒母時少大一歲哀過淚血病篤亦盡死
強之藥廼生或欲奪其節母抱圻哭曰吾所不死者
以有此孤耳吾嫁姑安歸終其身七十八年冰蘖其
操如一日於是郡邑鄰封無不稱曰蔡有節婦燠死
圻始八歲舅氏時任大同都司斷事母携之從無何
舅氏卒家甚貧母以教子爲首務圻少頗放逸母痛
繩之圻遂改行業儒駸駸有軒舉志既長嫺文詞工
六書爲名公墨士所器重正德間逆濠變作圻獻禦
賊五策於維揚將守瑤嘉靖初御史秦君鉞檄圻緝
武皇南巡實錄尋受知於時宰桂公薦入史館桂罷

東坡集卷之二十八
相圻爲抗疏請皆母之訓也於是京師中外莫不稱
曰蔡有慈母子讀之既迺歎曰嗟乎夫人有一行君
子無棄焉况全懿乎嘗論之百善原於孝母氏仁愛
實出天性聞爇死之日舅氏問曰爇死何囑對曰夫
但以先姑久不祀囑婦以是請舅氏感焉姜遂入祀
嗟夫茲非母氏之孝篤其生而及之遠者哉惟孝故
節惟節故慈爲女之賢養固有體矣今日蒙 恩旌
節嗣日昌大後昆孝之獲報可涯也哉是宜表之以
風來祀

迪功郎見一盛公墓表

嗚乎此吾外祖盛公第三遷之墓也公生於宣德己
酉五月二十一日卒於弘治辛亥九月二十八日得
年六十二初葬於禮安鄉故縣運河之南吾祖朴庵
宗伯翁爲表其墓矣江齒土感嘉靖元年復遷北原
江愈逼厥孫時復遷公暨父叔諸塚於餘中張竈港
東嘉靖二十七年二月二十一日也遡公之沒甲子
僅一週耳碑字剥落殆半時復謁子表之子奉讀先
祖之文感外祖之存沒再拜流涕按故表增新跡而
言曰公之先祖仲哲父濂字本清世有隱德爲海門

右族母謝氏成氏公諱英字世傑少游邑庠性豪邁
穎悟過人弱冠補廩膳生久不得志於場屋歲貢試
天庭得上選公曰吾平生抗志青雲不能汨汨居人
下迺今庠序畢業矣苟得授一散秩道遙林丘睥睨
卿相不賢於奔走空溷中耶遂謁銓曹拜職迪功郎
以歸隱特構一軒為栖息所扁曰見一因以自號蓋
取昔人林下何曾見一人義也居常焚香掃地與至
輒端坐彈琴庭畜一鶴琴罷或呼鶴引舞嘯詠竟日
客至則雄談高論聲徹於外聽者唯唯不能出一語
至求田問舍之事不屑為也是以達官閭里共賢之

稱曰盛公盛公鄉有不決事毋求正於公配潘氏性
溫惠事公唯謹正德十一年卒得年八十有六子三
儀太學生密縣簿室李氏姜氏壽八十一儼太學生
勤學志科目未遂卒室崔氏潘氏僕庠生蚤卒室戴
氏三女長適吾父宗伯公崑贈淑人次適戴浩次適
孫蕃孫男四長業太學生隆平訓導固安教諭次爵
蚤卒次壽次即時曾孫九一元應龍庠生應蛟應魁
應期應陽應鍾俱業儒二尚幼嗚乎公之高尚桐已
表諸邑志逸士傳中茲復表其墓公庶幾不朽矣乎

東洲集卷之十九

傳四篇

蜀岡先生傳

維揚崔桐撰

蜀岡先生者。揚之江都人也。盛姓名儀。字德章。江都
有蜀山。故號蜀岡。云先生襁抱中。即能記誦。少長苦
志績學。不憚寒暑。領戊午鄉薦第六人。卒業太學。兩
居元選。登乙丑進士第。先生於古今書。無所不讀。故
於天下難易。亦無所不能為。觀政吏曹。時能抗逆
瑾。不為致書冢宰。剛介之聲。已藉藉在人。及主事禮

曹數以外夷進言事抑權倖王永又執奏不當加賞
誘降夷人怒逆璫銓曹以爲賢改監察御史劾天下
不職吏若干人具奏民間利病若干條風稜棘棘無
所忌避外補山東僉事遷副使歷職幾十年有巨寇
劉宸輦攻城邑殺長吏勢甚劇先生募智將驍卒躬
親矢石間多爲方畧斬首千餘級境內以寧後二年
商河盜起復建議官軍入城支糧緩不及事請遣官
齎銀隨所至買糧以給賊遂撲滅迺若問賊吏誅權
猾寬疑獄理侵漁卹夫役凡可以興革者不難以身
任之東藩之政一時爲新服闋改雲南典屯政摘發

諸節侵冒糧銀吏百餘人咸帖然輸服無稱冤者遷
湖廣廉使久滯之獄剖決如流守令雖遠在數千里
悉廉其才否以公舉刺時湖省多盜建議置僉事一
人專督江防兼理兵備一人駐長沙諸郡嗣是水陸
無虞民歸德焉遷本省左布政使會朝廷遣大臣
取大木索價徵夫一省騷動先生請以買木羨餘次
第雇役民困稍蘇又顯陵之役計費不貲廼贊翊
內使崔文務在節省又歲凶民饑人情洶洶廼蠲
已責散儲拵幣所全活者甚衆先是先生以入覲
可否屬吏忤當衡久之始遷太僕卿時甘肅用兵

詔解馬二千匹給軍先生議每郡四更儻夫事獲不
擾又議置別庫以儲露積無何以不偶於俗被論得
閒住既以顯陵功詔致仕先生性至孝友學術醇
正嘗議定曾子廟制應詔陳言請崇尚周朱釐正
文體爲士論所題居官勵志清白林居惟舊廬數椽
足以容膝薄田數畝足以充虛愉愉焉著書授徒訓
子力農若不以爲窘也對客談論經史品題今昔人
物疊疊不倦語及求田問舍事笑而不答每出城市
雖闐闐鄙夫亦曰盛公來矣是吾鄉好人好人鴻儒
學士稱志行端潔者必曰蜀岡先生後生小子稱經
藝精到者必曰蜀岡先生嗟夫先生之學行才望有
此所得亦多矣程之豐祿峻爵於世道無所軒輊者
賢不肖何如哉

贈光祿寺少卿范公死節傳

范光祿諱琛字廷獻號東山宣城人高祖惠任德冀
二州同知祖斯福父晟母施氏光祿狀貌魁梧雙目
炯炯性剛直負氣不能爲泮忍事少游郡學有文聲
宿學老儒多所推重督學御史浮梁戴公少可許得
光祿試卷大器之成化丁酉中應天鄉薦屢試春官
不偶弘治癸丑謁選天官得江西清江令以母憂去

服闋改令瑞金居數月閩廣賊作夜半殺門卒攻城突入時瑞民洶洶竄伏左右有強光祿急去者光祿怒髮上指挺然撫膺曰吾去土誰與守吾生平欲丈夫其行而學兒女子以自免於節義謂何遂從民兵數十人迎敵殺賊二十人有奇相持至翌日賊少却薄暮光祿力屈爲賊所得挾至宋卒舍所問庫藏所有光祿不爲屈詈不絕口賊憤遂遇害時乙丑歲正月二日也守臣上其狀

天子哀之贈光祿寺少卿賜葬祭命有司廟祀立石廕其子麟爲國子生光祿家居喜賑卹貧乏爲閭里所德治清江平賦興學屢白疑獄瑞金俗尚行賄公禁之無敢奸者死之年若干

史臣桐曰予讀武宗實錄乙丑之寇臨江瑞州新淦永新諸郡被毒多矣而守令非無其人以身徇民者周副使憲范知縣琛二人耳琛小臣也而能樹節炳炳可尚也已使之當塗分閩緩急其可倚也夫菁莪之化琛奚負焉而景風之恩志士將無有所興乎
誥封一品夫人許母李氏傳

一品夫人者桂國少傅文淵閣大學士松臯許公之配冢宰襄毅公之子婦也夫人姓李氏世爲河南洛

陽人父祥母鄧氏祥與襄毅公並以才名擅一時最相友善襄毅公憲副山東祥以貢士任濟南推官修好如故不以司屬相臨也襄毅公爲松臯公謁婚於祥祥雅愛松臯公知其必爲大器遂以夫人妻之時合卺濟南無何偕夫人歸於許一品太夫人高家訓嚴肅夫人孝養舅姑自任勤苦一衣一食必躬必親太夫人甚宜之松臯公舉丙辰進士授大名推官遷監察御史戚族爭榮之夫人未嘗有矜色松臯公以論事謫知臨淄會襄毅公卒行服三年夫人哀毀盡禮殯葬質祭咸經理比暮則抱兒潛匿高夫人側

逮曉始覺也既松臯公陟浙臯僉憲副使提學山西叅政四川布政浙藩夫人隨任念太夫人戀戀不釋得一異味輒寄供太夫人曰吾不忍以甘旨自奉也松臯公陟光祿卿至刑戶二曹尚書夫人亦由孺人累四封至一品夫人矣尚念太夫人年高還籍省侍以百金買地於城西立舍鑄佛爲太夫人祈壽考松臯公尋亦乞歸養太夫人卒夫人哀痛幾滅性蓋其至孝出於天性故不爲老少窮達所移如此夫人性溫淑謙挹處娣姒有禮嘗從 皇后親蠶內苑以伯氏莊敏公一品夫人坐列已下踣踣屢顧不自安命

婦中貴廉其故莫不稱嘆處家甚儉約然好施舍憂
居中值歲凶每以布粟徧問親里貧乏者又置棺百
具以給貧不能葬者辛丑年松臯公以冢宰乞休尋
復 召典銓衡次年冬夫人得痿疾乙巳漸劇以八
月二日卒于京師時公已登台輔矣距其生成化十
年四月二十九日得年七十有二禮曹以計聞

天子哀之遣行人徐洛治葬事賜祭二壇蓋殊典也
夫人蚤歲生子女凡數乳皆夭折一子餽以父蔭累
官督府經歷陟辰州知府以夫人疾請內職侍養改
禮部員外郎辦中書事 欽給正四品服女三側室

王氏出長適陝西都指揮張蓋臣次適山西監生張
良士次適洛陽王憲副子生員王陽生孫男二長茂
祿蚤折次茂植夫人卒之日桐往弔焉松臯公涕滂
淫下語桐曰夫人平生舅姑嚴則養而能敬吾性約
則儉而不侈乏婢僕則職勞不倦置貲蓄則安而無
怨計匹吾五十五年矣中間遭兒女夭折之苦奔馳
悲愁之艱亦備嘗矣今吾沐 朝廷厚恩高爵重祿
所欲可致而夫人棄予以逝何能爲情耶桐曰夫人
賢矣貴矣壽矣其有終矣尚何憾乎公之所不已者
夫婦之私也夫人之所無憾者義命之公也松臯公

曰唯唯若子之言吾亦庶幾無憾矣乎遂自爲狀屬
桐傳之以昭閭懿章 君寵垂不朽云

朝列大夫張君傳

張君諱萱字德暉號頤拙松江上海人也自其先桂
五居上海之高陽里得名張家浜張姓始著桂五生
玉蟾玉蟾生隱德隱德生志恒恒生述述生熙熙君
王父也字民和號梅溪君王母潘儷梅溪有令德君
生而簡重不喜兒弄弱齡就業於伯兄萊守以英敏
見竒比長屢不得志於有司君益勵力積學不爲疲
也竟領弘治戊午鄉薦登壬戌進士第筮授鄱陽知

縣鄱治附饒吏姦民衰號稱難治且歲輸無藝符繁
力屈民以爲病君至一切紓以惠政而抑強蠲污獨
加嚴焉邑有滯獄君爲疑者讞之濫者勿聽刑以平
稱機兵之役冗食者衆君令分番歸農以省工費之
半俗尚陰陽家說親死久不殯悉示以法里無留喪
焉甫三年以案治一小吏不假借吏遂巧詆君於上
官坐當調職至京師時逆瑾方燄朝士多濡足其門
君獨不往時論高之踰年得嶸縣君曰官可改志不
可改也嶸之豪右多匿丁田以輕賦君悉括其實無
所詭隱學宮時廩側大爲繕葺以敦歲祀故有五倉

散置君聚爲一以便民且省斗級費民有靈齒者置
漏澤園洎義塚戒所在揜埋之諸所營辦咸取庀贖
金金無入私橐者君抱公履方不能偶俗以稱時求
以是失使臣意至刺君於朝然輿論方歸望於君
銓部亦廉其素得不絀正德庚午改政和政和小邑
也比域浙省每爲慶元龍泉諸縣流民所苦君嚴令
慎防民賴不擾巨室多隱蔽田租致小民有無稅之
徵君曰稅以田錯制也有徵無歸毒在巨室爲覈免
之簿書遂正巡按賀御史賢之移文兩浙以式先是
庠士又訕科第君躬親課試登薦遂不乏壬申擢守

茶陵州州境比江右民雜習悍盜賊多恃黨亡匿不
可捕詰君類編其族威以連坐民懼盜息山鄉豪猾
有侵負官物者君置元惡於法民知更行永新民越
境占田歲負稅餘三百石君狀其弊白當道責永新
吏督徵轉輸以紓民累至若禁市聽均賑卹可以利
民者靡弗寘力焉巡撫安成劉公荆山王公文章薦
君未及報以母憂去丁丑改潞州州有藩府輿役之
擾且民以上絀爲累君悉禁之先是歲徵無定制右
族緣以爲奸君善爲會計使邊輸存留輕重相等焉
時逆彬勢赫赫君不難以身翼患民倚以安巡撫張

公嘉其迹特旌異之無何擢湖廣僉事去之日民遮
道攀泣相率畫像建祠以俎豆君君蒞湖臬恩威兼
著長寶二府報獲盜百有四十人君察誣引者衆悉
原之尤嚴獄囚瘠死之禁不得令仇家有所中傷時
有捕蛇之役君遣囚徒行得無擾良民麻城馬政多
奸荆廠額外濫稅皆釐正其弊當道稱其名冠湖臬
威加荆岳治迹考最嘉靖壬午擢本省叅議主糧儲
先是侵剋積弊邊衛尤甚君立法禁處奸無所售卒
以直亮不阿忤意巡撫引疾致政既歸怡情泉壑謝
跡城府構一亭扁曰願拙日課二子諸孫其中意豁

如也君性素友愛喜分施梅溪翁既卒撫二庶第甚
恩歲貽租入餘於祠堂以給宗族貧乏者鄉人嘗負
五百餘金悉焚券不責償其歷官居鄉動皆可法如
此居五年以疾卒時嘉靖丁亥三月十有六日也距
其生爲天順己卯六月二十有八日得年六十有九
配陸氏有婦道先君十有八年卒繼室孔氏 先聖
五十八代孫子男二長鳴謙領正德丙子鄉薦次鳴
殷女二長適山拱宸次適朱朝寵孫男六長仕郡庠
生次儒次俸次化次儲孫女三長適郡庠生沈盤次
許聘姚蕃次幼庚寅年松江府庠生高君行義群請

於督學御史馮君表祀鄉賢祠墓從其先在曹烏涇
之原

論曰士君子立心行已寧見誣於小人毋見罪於君
子見誣於小人其一時鉅錮擠絀若有不可堪者而
特熙議定卒樹風聲見罪於君子則生前之竊享不
足以贖身後之公誅亦何益哉張大夫盡瘁王事餘
二十年中間愠於群小迂意上官秩不過朝列以終
其身斯不謂咥生於義功浮於祿者耶然而去郾則
劉進士錄為志名宦去嶧則王家宰華為記嘉政去
政和則滕侍御祐為記興學去茶陵則張太史治為
傳循良去潞則崔司成銳為記生祠嗟夫鴻垂碩望
若大夫者視婉婉小夫孰顯而孰晦耶吾錄大夫行
而重有感焉

說一篇

克齋說

大司徒王翁以克名其齋理儒學士重名繹義為之
論者甚悉以已對禮者其旨精以已對人者其旨絃
以克為能者其旨捷測微探眇疊疊纏纏若莫涯涘
客有求其是於司徒翁者翁笑而不答客廼謁諸東
洲崔子崔子曰夫道淵已浩已莫可垠壖已是故以

精求者以精應以欲求者以欲應以健求者以健應
譬如日月懸天旁窺四顧何照非明千竅百川何地
非影是故以萬求焉象若顯蒙以一求焉會有歸極
條分縷析皆可明道也左宜右有皆可行道也子盍
考諸司徒翁之素乎絜已靜修動中繩墨秉公履直
一節不渝斯不亦克已復禮之義乎排難解紛抑浮
惜費邦儲臺憲肅紀阜民斯不亦視人爲已萬物一
體之義乎秩履崇卑事歷夷險軼譖儻猷荷負不屈
斯不亦克身克職之義乎夫道一而已矣即翁之行
以本其心即翁之心以原其道即翁之道以證其名

可以思過半矣客若有得焉退而語諸翁翁曰噫嘻
予何有得於是哉子其問諸太初

謚議一篇

襄毅潘公謚議

兵部尚書兼右副都御史潘公鑑之卒也

天子從禮臣之議俞內閣之擬贈太子太保賜謚曰
襄毅蓋謚法所謂因事有功果而能斷者也公以清
姿雅操閎才碩負峻擢賢科敷歷中外治狀之章章
者如筮仕廷評則辨孀婦之誣子讞未決之群獄僉
事福建則弭惠安南安之劇寇平福州邵武之叛卒

兵備貴州則發揚章之秘譎再任信陽則舉捕蝗之
荒政廉訪四川則四指揮揭黃之冤白右轄江西則
出納詐僞之弊革左轄四川則軍餉之艱紆巡撫四
川則均糧之法行麗江之夷靖擒關南馬興而蜀北
以安戮深溝番賊而運道無阻及其共 陵殿之後
也則採運八省議蠲派辦小民之擾至若量材節費
一疏愛國憂民之義溢於詞表 太廟之役也理屬
吏之誣獄抑土官之濫典及其奏功蒙賞則以優弛
疲民爲請斯不謂因事有功矣乎夫見利而競進見
害而逡巡人情之恒也公直節義氣不難艱險如誣

子之獄揭黃之疑雖犯怒刑曹事涉招毀而堅不可
移逆濠之變汀關之防羣僚選悞而挺身獨往關南
多釁出羣策而卒收其功節費甦民兩疏批逆鱗而
無所恤斯不謂果而能斷矣乎桐考古者以一字爲
謚一字之褒難也謚以二字自周漢始而一字並美
尤難昔賈充晉武之幸臣也死而太常議謚曰荒帝
雖易以爲武而荒之稱卒不可捨唐蕭瑀亦賢臣也
然端直鯁亮近貞性多猜貳近褊故謚曰貞褊而美
惡並形若太保八者可謂名稱厥情而具美無憾矣
乎抑考公性純孝昔寓延平聞母施計匍匐北歸妻

予在省莫之顧也遷貴州過里見其翁南峯公之衰
白也遲回不忍釋侍養踰年而後行傳曰事君不忠
非孝也蒞官不敬非孝也戰陳無勇非孝也又曰孝
弟也者其爲仁之本與公既立其本矣夫何有於道
生謚以襄毅也實宜

崔東洲集卷之十九

崔東洲集卷之二十

維揚崔桐撰

祭文十篇

祭大司成魯先生文

於乎先生鴻聲碩負自家食時已藉藉士林矣既而
魁天下遊內翰陟師氏名重中外亦有年矣在告巖
居望繫人心莫不翹首其一起者又餘十年矣於乎
天之奪先生胡爾其太速也哉惟先生之師模兩京
也選極海內教紀丕植文陋雕蟲學耻章句呂正獻
公之究心經理足端教化之源楊龜山之學本正傳

大爲諸生慰勞是以東序化弘上庠學振祁祁髦士
升堂入室聯翩甲第者濟濟惟人功在斯文殆不細
矣使先生翻然再起則黃閣秉均蒼生造福又豈淺
淺也哉然而臺司迭薦而高卧彌堅竟爾東壁受蝕
下壚長游可慨已夫不知者以爲先生不遇於天下
知者以爲非先生之不遇天下之不幸也是大不然
夫沃其根者蕃其末深其源者長其流先生道尊業
廣還元返朴掃八風之舞識兩疏之機使頑者庶懦
者立一出處所以沃吾道之根深吾道之源者弘
矣功在吾道功在斯民也是先生未爲不遇而天下
亦大有幸也歟某等追瞻山斗恨遠光儀俎豆寄衷
東臨再再尚饗

祭東軒張先生文 陽峯廼翁

於乎先生器存家聲才映時賢騫舉要衢履潔秉堅
羽儀 宸署翊化臬藩懋樹嘉政勳策黼遙烟霞心
會爰屏世喧閒閒自林頤和涵玄天錫茂胤以引世
傳縱橫藻翰瀛苑名懸日陳墳典啓沃 帝前錫予
孔庶紫紘金蓮先生逝矣哀徹廣庭 帝曰有子昭
典載宣廼藏廼祀後祉自天某首在史館令子同官
愛我教我契托十年今也南遊訪舊弔遭寄情觴豆

江漢茫然尚饗

祈晴文

雨本澤物然天戾氣則為妖水本利人然地脅陽則為災神之所知也夫民惟邦本穀惟民命有司也者植民命以為本者也而神明也者祐之民以翼有司者也詩曰日祖有神秉畀炎火又曰敬恭神明宜無悔怒蓋憂患者在乎人而紓患者望乎神吾民之厄人神共有責焉矣於乎何華楚之民往歲告旱嗣歲告溢旱溢糾纏降罰實多即今自春徂夏夏徂秋十日九雨雨淫陰伏江湘湖澤淼焉巨浸市闔為河宮

饑吐就蒲羸地埔沉薨棄岸平谷來牟病而昭賜弗蒙禾稼沒而有秋何獲是將剗我根本而重可哀焉者也意者大庭弛修靡反廼闕而重我神怒與然明明天子洗衷素慮露禱走幣用勤弭恤者至矣意者表誠啓聖仁愛我君與而民其隄危胡可以輕試與將無桐等奉公不職貪墨毒尅苞苴在門斲詛在園絲征銖課神心不平垂割有衆與然一有於此罪在吾等而顧及之元元何哉有司有罪而貽之民非神之靈也若其無罪而罪吾民非神之仁也惟城隍之神鑒隲方省奉有明勅若曰罔聞幽明之責

謂何惟風雲雷雨諸神嘒煦震蕩帝命率育若曰罔
聞咸亨之德謂何惟山川社稷各有疆域各載厚德
德不在物時祀之典謂何神何不飛螭節騁龍輿上
告天神下徹地祇挽否爲泰轉沴爲祥雲旗拂霽風
馭時揚羲和運暉河伯受職土神呈瑞先農協力則
民受嘉生邦本盤石庶乎 皇心載寧百工惟休而
神之時薦歲祀亦得世享乎報酌矣謹告

祭白侍御文

於乎哀哉先生之才修能瓌負紬繹不窮足以翊乎
世猷先生之德媿養弗遷任道以朴足以追乎前修
先生之器溥濶不苟淵涵不察足以隘乎時儔抱節
南趨經營帝丘盡瘁以事知殫慮周以王臣之匪懈
固造物之所優而白簡方嚴丹衷甫露溘異化而載
休意者至人之不恒美忌多取俾英華之奄收意者
帝愛厥才云徵記乎玉樓意者悲氛壤之迫阨軼九
垓凌六氣渺恬愉而上浮於乎先生人生過隙日月
幹嬗誰其能留先生之獨留者芳聲茂績洋洋纒纒
與正氣而並適夫何憾哉然而攀輻執紼薦醴旅羞
愴愴而弗忍舍搖搖而若何求殆我同事者之所私
不能不臨秋颼而披淚聆冥幢而寄憂也尚饗

禱雨文

工有常憲帝有顯澤赫赫孚命用正厥德嗟嗟楚方
歲不順成匪水則旱民鮮嘉生天之不吊實民之尤
民亦何知召之有由惟予群工靡修多闕適見於天
開右弗屑火炎南陸東井裂光靡稼不萎靡草不黃
淫陽鬱蒸札瘥有作施舍徬徨鬼神廼索神靈合天
民命依神敢禱敢告暴棄具陳庶寮既禱申之庶長
降物展悃神若莫享惟神孔章淑慝是司工有弗率
神鑒勿遺弛我民罰潤以膏液興雨祁祁紆憂舉阨
小民不咨庶正載安神亦表靈舍煦之寬尚饗

謝雨文

天心仁愛施無棄物神享惟誠非馨黍稷民之多艱
歲事蹇逼吾工弗逮策勵罔克敷衽陳詞用靳龐德
皇靈不違降鑒頃刻灑以甘霖洗我沴域蒸黎歡呼
懸解焚熄俯循何修奄受歆格神實秉鈞恩威莫測
惟神終惠閔茲孔棘汪澤沛仁有流無塞時雨時暘
司命任職有生熙熙有穡疑疑民工並休邦本是翼
尚饗

祭陸儼山宮詹文

桐與先生產唯限於一水道寔契於同源相聞於邠

角之年受知於塲屋之雅洵沫於風塵之鄉邂逅於
雲龍之會悲涼於離別之秋馳情於魚鴈之托期我
以遠大翊我以高明屬我以愛子示我以胷臆真道
義之師友也桐茲抱痛海廬念及交游誼分雖夢寐
食息未嘗不在儼山方期天啓佳辰再從先生之躅
覲德金相聯班玉笋相引相翼攄愚誠以上報天
子下究宿學而先生已矣且柰何哉意者天下之至
寶爲造物者忌不欲久在人間邪抑造物者有意於
先生故嗇其終以留未罄之休於後人邪嗚呼海濶
天長瞻望何及徒有腸切聲吞遙對南雲耳祇遣一

觴身羈心越哀哉尚饗

祭曹邦彥戶曹司務文

嗟乎先生於吾輩同登南圻丙子賢書計於今餘三
十年矣日月代嬗亨屯異遇生死殊塗回首疇昔共
醉鹿鳴連翩白下之英屈指落落如晨星秋葉存者
幾何幸而先生筮仕地曹羽翼邦儲吾輩三四人亦
各以薄秩合簪京署論交話舊少罄平生而先生詎
云舍我而逝爲情當何如哉念先生學醇行篤言訥
貌溫惓惓小心不訾桀黠思資積勞已五六稔大夫
清陟例在旦夕先生奄爾迎榮靡終後祿天之報善

人固若是耶意者天於善人上食其報不若死昭其名享厚其躬不若慶垂其名先生蓋棺之秋名卿碩士僚友鄉曲莫不哀哀嘆息羣誦宿賢而令子以奇雋之器尋魁鄉薦是先生之令聞益章芳緒有托彼蒼者之報善人未謂不豐且遠也斯可以瞑目矣桐等醕羞展悃感倍恒情追叙久要實勞心曲哀哉尚饗

祭蒲亭文敏公墓文

門生桐等謹奠于文敏李公之墓曰嗟乎先生之成就吾儕也或擢秀南圻或連茹冀北媿爨下之凡材

幸兼收而並蓄先生之教育吾儕也開我迷途端我法程實恩同乎骨肉豈誼止於師生先生之俯愛吾儕也弛嚴範而色引展情欸於燕語坐春陽於藤軒剪丙夜之蓮炬念師門之睽離紛宦轍而不齊曾歲月之幾何成未訣而長違嗟乎先生玉粹金昭祥麟威鳳逸韻清標 聖朝梁棟往牒爬羅於蓬觀詞鋒景煥乎仙瀛未屑於絺章繪句才兼夫錢穀甲兵鈞秉台衡羨調鼎鼐時屬望乎弘攄 帝有須于亮采夫何彼蒼奪我哲人匪小子之私戚關世道之亨屯桐等過董墓而生悲媿玄塚之莫助 之秋風

嘆楷林之朝露德深感倍詞切心馳椒棗肅獻神其
有知

祭周白川太宰文

嗟乎先生之不可作也真邪非邪英靈正氣今安歸
邪念先生之風範修髯皓髮雙睛炯然神采整峻動
履便旋群以爲天下之慶必求其年奉瞻未幾胡云
已矣誰能舍旃先生學醇而古蚤涉道涯靜而有養
介而不華諫垣抗論臺憲繩邪剔歷中外一節無瑕
蕭然靡橐尺寸莫加是之謂有爲有守知有國而忘
其家先生才長而毅行篤而純振振君子蹇蹇王臣

克敬克戒攄悃一人夙興夜寐獨任苦辛旌別淑慝
盡瘁以淪是之謂奉公委質知有君而忘其身先生
之未秉銓衡也公論攸歸望之如渴既拜新命也輿
情翕然朝野共悅彼蒼者天胡福之而遽歿予之而
尋奪凡厥有知孰不爲之歔歔哽咽况在吾鄉舊愛
情何能遏嗟乎有酒旒旒有敬旒旒聊寄哀思神其
弗吐尚饗

東洲集卷之二十

Handwritten text in a vertical column, possibly bleed-through from the reverse side of the page.

